

MINGGU PRAPASKA KE-4, 27 MAC 2022  
(MINGGU LAETARE)

Antara  
Pertaubatan,  
Kemarahan  
yang Wajar, dan  
Kerohanian yang  
Berpusat kepada  
Ciptaan



*Minggu Laetare dalam Bahasa Latin bermakna "Bersukacita". Apa yang ia beritahu kita ialah walaupun di tengah-tengah penebusan dosa Prapaska kita, Gereja mengingatkan kita bahawa adanya sukacita dan harapan kerana iman dan harapan kita yang berakar dalam Tuhan Yesus yang telah bangkit.*

### *Pesanan Laudato Si'*

Pernyataan ini menunjukkan martabat tinggi setiap peribadi manusia, yang "bukan hanya sesuatu, tetapi seseorang. Dia mampu mengenal diri, menguasai diri, dan bebas memberikan dirinya dan masuk ke dalam persekutuan dengan orang lain". Santo Yohanes Paulus II menyatakan bahawa cinta yang sangat khusus Sang Pencipta untuk setiap manusia "memberikan kepadanya martabat yang tak terbatas". Mereka yang berkomitmen untuk membela martabat manusia, dapat menemukan dalam iman Kristiani alasan terdalam untuk komitmen itu. Betapa indahnyanya mendapat kepastian bahawa hidup masing-masing peribadi tidak tenggelam dalam kekacauan tanpa harapan, dalam dunia yang diatur secara kebetulan atau dalam kitaran yang berulang tanpa hentinya! Sang Pencipta dapat mengatakan kepada kita masing-masing: "Sebelum Aku membentuk engkau dalam rahim ibumu, Aku telah mengenal engkau" (Yeremia 1:5). Kita dikandung dalam hati Allah, dan kerana itu, "kita masing-masing adalah buah fikiran Allah. Setiap kita dikehendaki, setiap kita dicintai, setiap kita diperlukan".

*Laudato Si' #65*

*Ambil masa untuk mempertimbangkan bahawa diri kita mempunyai banyak sisi (atau banyak aspek). Kita boleh menjadi seorang penyayang dan membenci, pemurah dan mementingkan diri sendiri, pemaaf dan menyimpan dendam dalam hidup kita.*

*Mana antara bahagian ini yang paling kuat dan mengapa? Minggu ini, kita melihat kepada Allah Bapa untuk memberi inspirasi kepada kita ke arah sikap yang berorientasikan di atas kasih sayang dan persekutuan.*

## **INJIL – LUKAS 15:1-3,11-32**

### **Anak yang Sesat**

Pada suatu hari banyak pemungut cukai dan orang yang dihina masyarakat datang mendengar Yesus. Lalu orang Farisi dan Taurat mula bersungut-sungut. Mereka berkata, "Lihatlah, orang ini menyambut orang yang dihina masyarakat, bahkan makan bersama-sama mereka!" Oleh itu Yesus menceritakan perumpamaan ini,

Yesus berkata lagi, "Ada seorang bapa mempunyai dua orang anak lelaki. Yang bongsu berkata kepada bapanya, 'Ayah, berilah harta bahagian saya sekarang juga.' Lalu bapanya membahagi hartanya antara kedua-dua orang anaknya. Beberapa hari kemudian, anak yang bongsu menjual bahagian hartanya, lalu meninggalkan rumah. Dia pergi ke negeri yang jauh, dan di sana dia memboroskan wangnya dengan hidup berfoya-foya. Dengan cepat wangnya habis. Pada masa itu kebuluran yang teruk melanda seluruh negeri itu, lalu hidupnya melarat kerana dia tidak mempunyai apa-apa. Oleh itu dia bekerja bagi seorang penduduk negeri itu, yang menyuruh dia menjaga babi di ladang. Dia begitu lapar sehingga ingin mengisi perut dengan makanan babi, tetapi tidak seorang pun memberi makan kepadanya. Akhirnya dia sedar dan berkata, 'Semua orang gaji ayahku mendapat makanan yang berlebihan tetapi di sini aku hampir mati kelaparan! Aku akan berangkat dan pergi kepada ayahku lalu berkata begini: Ayah,

saya sudah berdosa terhadap Allah dan terhadap ayah. Tidak layak lagi saya disebut anak ayah. Anggaplah saya sebagai orang gaji ayah.' Dia pun pulang kepada bapanya.

Dia masih jauh dari rumah apabila bapanya nampak dia. Dengan penuh kasihan, bapanya lari menemui dia, lalu memeluk, dan menciumnya. 'Ayah, ' kata anak itu, 'Saya sudah berdosa terhadap Allah dan terhadap ayah. Tidak layak lagi saya disebut anak ayah.' Tetapi bapanya memanggil hamba-hambanya dan berkata, 'Cepat, bawalah jubah yang terbaik dan pakaikan pada dia. Kenakan cincin pada jarinya dan kasut pada kakinya. Pilihlah anak lembu yang gemuk lalu sembelih. Marilah kita rayakan kepulangannya dengan perjamuan. Anakku ini sudah mati, tetapi sekarang hidup pula; dia sesat, tetapi sekarang ditemui semula.' Lalu perjamuan itu dimulakan.

Sementara itu anaknya yang sulung di ladang. Dalam perjalanan pulang, apabila dekat rumah, dia mendengar muzik dan tari-tarian. Dia memanggil salah seorang hambanya lalu bertanya, 'Apakah yang sedang berlaku?' Hamba itu menjawab, 'Adik tuan sudah kembali! Bapa tuan menyembelih anak lembu yang gemuk, kerana bapa tuan sudah mendapat anaknya kembali dalam keadaan selamat. Anak sulung itu begitu marah sehingga dia tidak mahu masuk ke rumah. Lalu bapanya keluar dan memujuk dia. Tetapi dia berkata kepada bapanya, 'Lihatlah, bertahun-tahun saya bekerja seperti seorang hamba untuk ayah. Tidak pernah saya membantah ayah. Tetapi apakah balasan ayah? Tidak seekor kambing pun disembelih, supaya saya boleh bersukaria dengan kawan-kawan saya! Tetapi anak ayah ini telah memboroskan segala harta ayah dengan pelacur, dan apabila dia kembali ayah menyembelih anak lembu yang gemuk untuknya! Bapanya menjawab, 'Anakku, kamu sentiasa di sini dengan ayah. Segala yang ayah miliki juga milikmu.

Patutlah kita adakan perjamuan dan bersukacita, kerana adikmu sudah mati, tetapi sekarang hidup pula; dulu dia sesat, tetapi sekarang sudah ditemui semula.”

## **RENUNGAN**

Terdapat tiga naratif berpusatkan tiga watak di dalam injil: anak sulung, anak bongsu, dan bapa. Injil memberitahu kita bahawa anak bongsu melihat kesilapan dalam cara hidupnya dan bertaubat. Dia juga membuat keputusan untuk memberitahu bapanya bahawa dia tidak layak lagi dilayan seperti anaknya. Dalam pertaubatannya, dia melepaskan keadaan dirinya yang lampau (mementingkan diri sendiri/gaya hidup hedonistik/keangkuhannya) agar dapat memeluk kembali bapanya.

Naratif yang kedua adalah tentang anak sulung. Ramai pakar Alkitab menunjukkan perumpamaan Yesus patut fokus kepada anak yang kedua dan bukannya anak yang sesat itu. Anak sulung itu nyata kecewa dan marah bahawa adiknya telah kembali. Dia tidak berusaha untuk mempertimbangkan proses perjalanan adiknya yang membawanya balik. Dalam satu cara, anak sulung itu tidak “nampak” atau “betul-betul nampak” adiknya. Maka, tidak terdapat proses pemahaman.

Abang sulung itu cuma nampak apa yang dia tidak tangkap. Dia adalah seorang yang baik. Dialah yang tinggal bersama bapanya. Dialah yang melakukan semuanya dengan betul, tidak seperti adiknya yang tidak berguna. Namun, dia tidak dapat pun anak lembu untuk bersukaria dengan kawan-kawannya. Jika keadaan ini dibiarkan dengan dia, mungkin, adiknya akan kekal “dikategorikan” sebagai adik yang tidak berguna dan kekal “mati”. Dia “ok” dengan adiknya “mati” selamanya.

Mungkin, fokus itu sepatutnya kepada bapa yang mempunyai hala tuju berpusatkan kepada ciptaan. Bagi bapa itu, semua orang layak berkembang dan tumbuh seboleh yang mungkin. Tiada peluang kedua atau ketiga. Sentiasa ada peluang. Pendirian bapa itu ialah suatu yang selalu bersedia dan terbuka. Bapa itulah yang mula-mula nampak anak bongsu itu dan berlari ke arahnya. Bapa itulah yang mula-mula mencium dan memeluknya. Bapa itulah yang mengenakan jubah padanya, cincin pada jarinya, dan kasut pada kakinya. Bapa itulah yang memanggil untuk mengadakan perjamuan. Ianya tidak berakhir di situ. Bapa itu juga datang dan berbicara dengan anak sulung untuk memujuknya. Anak sulung itu juga layak dibawa keluar daripada keadaan yang marah kepada keadaan yang bersukacita. Sikap bapa itu merangkumi apa maksudnya mempunyai kerohanian yang berpusat kepada ciptaan.

### **LATIHAN PRAPASKA**

Adakah kita memupuk kerohanian yang berpusatkan ciptaan? Apakah jenis naratif yang kerap dimainkan dalam kehidupan kita? Adakah ianya anak bongsu, anak sulung atau bapa? Kita patut berjaga-jaga agar sikap kita tidak menjadi seperti anak sulung itu yang tidak melihat kebaikan, yang terperangkap dalam cara-caranya, dan di mana tiada apa yang boleh berkembang kerana ianya tidak mencapai persetujuannya. Mereka yang goyah mungkin terus kekal "mati" tanpa harapan untuk transformasi atau diberi "hidup baru".

Walaubagaimanapun, sikap Bapa itu memberi hidup. Perubahan, perkembangan dan transformasi sentiasa ada kemungkinannya dengan bapa itu. Bapa itu tidak risaukan tentang memberi persetujuannya tetapi agar anaknya kembali ke "kehidupan", telah hilang dan "dijumpai". Bapa itu mahukan kedua-dua anaknya

menjadi semua yang mereka boleh jadi. Apa yang anak bongsu itu perlu lakukan ialah bertaubat dan terbuka kepada Bapa itu.

Apakah jenis naratif yang kita hidupi? Adakah ianya kerohanian yang berpusatkan ciptaan, yang memberi hidup dan di mana kehidupan, sukacita, dan kegembiraan dimungkinkan? Atau adakah kita mempunyai kerohanian “anak sulung” itu di mana tiada apa yang berubah dan yang mati kekal “mati”?

Akhirnya, adakah Allah lebih berbelas kasih daripada kita terhadap satu sama lain?

*“Sesungguhnya, kasihnya yang besar itu menunjukkan bahawa dosanya yang banyak sudah diampunkan! Jika seseorang menunjukkan kasih yang sedikit, hal itu bererti dia menerima pengampunan yang sedikit juga.” (Lukas 7:47)*

## **PENDIRIAN SAYA**

- Marilah kita memberi komitmen untuk memupuk satu pendirian “belaskasih” terhadap semua, terutamanya kepada mereka yang paling mudah terjejas di sekitar kita. Mereka yang mudah terjejas ini adalah mereka yang miskin, para migran, warga tua, mereka yang tidak mempunyai rumah, yatim, dan sebagainya. Semasa musim Prapaska ini, marilah kita memilih untuk berbelaskasih dengan menyedari akan kehadiran mereka yang menghadapi kesusahan di masa pandemik ini. Kita boleh membantu secara peribadi atau komuniti dengan:
  - Membantu dalam usaha-usaha oleh wakil daerah kita dengan mengedar barang-barang keperluan.
  - Meminjamkan telinga untuk mendengar mereka yang telah kehilangan orang tersayang, yang kemurungan, atau berhadapan krisis-krisis disebabkan oleh pandemik.

- Jangan tidak memberi perhatian apabila kita nampak bendera putih di kejiranan kita.
  - Menjadi sukarela dalam aktiviti-aktiviti KED, POHD, SSVF (di mana mungkin) untuk melayani keluarga-keluarga yang bergelut dengan masalah di kawasan anda.
  - Membawa mereka yang menderita dan meninggal dunia disebabkan pandemik ini dalam doa kita.
- Bolehkah saya mengenalpasti orang atau orang tersayang di sekitar saya yang saya tidak mahu percayai dan terima bahawa mereka boleh berkembang dan berubah menjadi lebih baik di mana saya adalah batu sandungan kepada apa yang Allah panggil mereka untuk menjadi?





KEUSKUPAN  
MELAKA  
JOHOR

[www.mjdiocese.my](http://www.mjdiocese.my)  
🌐📱 mjdiocese  
📧📱 malaccajohorediocese  
[caritasmjd.mjdiocese.my](http://caritasmjd.mjdiocese.my)  
[creationjustice.mjdiocese.my](http://creationjustice.mjdiocese.my)



MJD  
50  
2022

[www.lenten.mjdiocese.my](http://www.lenten.mjdiocese.my)  
🌐 MJDLenTen